

Date – 16/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma leh Mizoram tlawha lo zin Union Home Secretary Pu Govind Mohan te chuan nimin tlai khan CM Office-ah meeting an nei.**
- 2. Mizorama Prisons department hnuaiia tan in hrang hrang, mi 1,386 awm theihnaah mi 1,624 an tang mek a, awm thei zata hisap aiin mi 238 in an tam.**
- 3. State Election Commission chuan Mizoram chhunga Local Council leh Village Council inthlan zawh fel a nih tawh avangin Model Code of Conduct hlih a nih thu nimin khan a puang.**
- 4. Prime Minister Narendra Modi chuan nimin khan India chu Global Future chungchangah hma an hruai thu a sawi.**

<><><>

CHIEF MINISTER

Chief Minister Pu Lalduhoma leh Mizoram tlawha lo zin Union Home Secretary Pu Govind Mohan te chuan nimin tlai khan CM Office-ah meeting an nei.

Chief Minister hi Home Minister Pu K. Sapdanga, Adviser to CM Pu TBC Lalvenchhunga, Chief Secretary Pu Khilli Ram Meena, DGP Pu Anil Shukla leh official pawimawh ten an tawiawm.

Chief Minister hian Mizoram a rawn tlawh avangin lawmthu a lo hrilh a. Hun nuam tak hmang turin duhsakna a hlan. An inkawmnaah hian Ministry of Home Affairs-in Mizorama hma a lakna thil hrang hrang te an sawi a ni.

Pu Govind Mohan hi sorkar laipua official pawimawh tak tak ten an rawn tawiawm thung a ni.

<><><>

PRISON STATUS

Mizorama Prisons department hnuaiia tan in hrang hrang, mi 1,386 awm theihnaah mi 1,624 an tang mek a, awm thei zata hisap aiin mi 238 in an tam.

Nimina Prisons department in an tarlan danin Aizawla Central Jail leh Central Women Jail chu tang awm tura hisap aia an tam zualna pahnih a ni a. Central Jail-ah hian mi 438 tang thei tura hisap a nih laiin mi 827 an tang a, Central Women Jail-ah chuan mi 96 tang thei tura hisap an nih laiin mi 120 leh an nu ten an hruai luh naupang 5 an awm mek a ni. District Jail Aizawl,

Lunglei leh Champhaiah te tang thei tura hisap aia tam an tang a. Hetihruah hian Prisons department hotute chuan Jail tang zat chu nitina danglam reng a nih thu an sawi a ni.

Tunah hian Mizoram puma Jail hrang hrangah thubuui ngaihtuah mek tang mipa 893 leh hmeichhia 137, damchung tang tur mipa 55, hrehawm taka lungin tang tura tih (rigorous imprisonment) mipa 316 leh hmeichhia 26, tang pangngai (simple imprisonment) mipa 184 leh hmeichhia 5, an vaiin mipa 1448 leh hmeichhia 168, bakah an nu ten an hruai loh theih loh naupang 8 an awm mek a ni.

Prisons department hotute chuan SASCI hnuaiah Mizoram Jail hrang hrang thawm that nan cheng vbc 55 an neih thu Akashvani an hrilh a. District tharah pawh hma lak zel a nih thu sawiin Khawzawlah chuan district jail tur ram neih a nih tawh thu leh LSC pawh tihfel a nih tawh thu an sawi a. Saitualah chuan district jail sak tawh a nih thu leh a la hman tan loh thu an sawi a. Hnahthialah chuan ram an neih fel tawh thu leh LSC an buaipui mek thu an sawi bawk a ni.

<><><>

SEC REVOKES MCC

State Election Commission chuan Mizoram chhunga Local Council leh Village Council inthlan zawh fel a nih tawh avangin Model Code of Conduct hlih a nih thu nimin khan a puang.

State Election Commission chuan vote chhiar zawh fel a nih thu leh result pawh nimin leh nimin piahah puan fel a nih avangin district pakua - Aizawl, Lunglei, Serchhip, Champhai, Mamit, Kolasib, Saitual, Khawzawl leh Hnahthial district-ah te vawiin chhun dar 12 atang khan inthlan chhunga dan zawm tur hrang hrang zawm tur kalpui mek, Model Code of Conduct chu hlih a nih thu an sawi a ni.

Nimin vek khan State Election Commission chuan Local Council candidate thihna avanga inthlan hun nimin, ni 14-a sawn Lawipu Local Council result a tichhuak a. Thlan tlin te hi Lalrinsanga ZPM, Lalnuntluanga Pautu INC, Malsawmdawngliana Rivung MNF, Lalbiakthanga ZPM leh reserved seat-ah Zohmingmawii MNF te an ni.

<><><>

CM

Chief Minister Pu Lalduhoma'n tun thla February ni 20 atangin Secondary Collection Centre (SCC) cum Auction Centre ah Sawhthing hralhchhuah runpui tan a ni dawn tih a sawi.

He thu hi Instagram kaltlanga tarlangin Chief Minister chuan sawhthing a sumdawngte tel vek turin a sawm a, auction chu cheng 50 atanga tan tur ani tih sawiin District Agricultural Marketing Committee (DAMC) te leh Coordinator bakah SCC a duty ten a tul angin an buaipui dawn tih a sawi bawk.

Kumin February ni 20 atanga sawhthing lei tan tur chungchang hi Agriculture Minister Pu PC Vanlalruata'n January thlaa chanchinbumite a kawmnaah a lo sawi tawh a, Minister chuan sorkarin Agricultural Market

Assurance Schemes hnuia sorkarin rate tur a tihchhuah tawh angin sawhthing chu kg-ah cheng 50 a lei a ni dawn a ti a. Mizoram puma khaw hrang hrangah society 675 a awm tawh thu sawiin heng society te hian district hrang hranga sorkarin a ruahman sawhthing lak khawma leina tur, secondary collection centre 54-ah an phurkhawm dawn tih sawiin District tina District Agriculture Marketing Committee in an lo buaipui dawn a ti bawk.

Minister chuan sawhthing chu India ram hmun hrang hrangah an thar nasat thu sawiin a bik takin India ram chhim lamah an thar nasat thu a sawi a. Sorkarin kuthnathawktute chu sawhthing an lei tan hun tura ruahman, thla thar ni 20 chu nghak hram turin an ngen a, thlai dangah pawh hmalak mek a nih thu a sawi bawk.

Hetihlai hian, nimin khan Adviser to Chief Minister (Implementation of Handholding Policy) Dr. KC Lalmalsawmzauva, chuan Mizoram State Rural Livelihoods Mission (MzSRLM) hnuia din Ropuiliani Women Farmer Producer Company Limited-te tharchhuah Sawhthing Metric Ton 10 hralhchhuah tur chu Hualngohmun dai, Aizawl atangin a vailiam a. Producer Company leh Reliance Retail Limited te thawhhona kal zel a ni a. Sawhthing hralhchhuah tak hi Sailam leh Chamring khua a Company shareholders mi 55 hnen atangin Company-in a leikhawm a, Reliance Retail Limited hnenah hralh chhawng leh in Kolkatta-ah phurhthlak tur a ni.

Dr. KC Lalmalsawmzauva chuan, " Mizoram sawrkar-in thlai 4 lei tur a thlante theih tawp chhuahin a market lamah hma a la zel a, zaah za hlawhtling nghal lo mah se, nasa takin hma an sawn a ti a. Sawhthing lei tur ten a hlawma leina mai tur an hre thin lova, sawhthing thar teuh siin Mizoram khaw hrang hrangah an vahkual a ngai thin a, vhuvingin Sawrkar chuan a hralhna hmunpui Secondary Collection Centre 66 lai district hrang hrangah a ruahman ta a ni a ti. Tun thla February ni 20 atangin heng Secondary Collection Centre (SCC) cum Auction Centres-ah te hian Sawhthing Auction runpui (Rs.50/- a tanga tan tur) neih a ni ang. Kum 5 a vei meuh chuan heng SCC te hi mumal zawkin an kal theih tawh turah beisei a ni," a ti bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

KTP DAY

Vawiin February ni 16 hi KTP Day a ni a, branch hrang hrangte chuan mahni remchan dan angin hun an hmang dawn a ni.

Central KTP Leader Rev H. Lalawmpuia chuan Mizoram chhung leh ram pawna KTP member zawng zawngte KTP day vawi 72-na chibai a buk a. KTP chu krista rawngbal tura chhandam, thil tha tir tura chhandam an ni, a ti.

Mizoram Synod Website-in a tarlan dan chuan, Synod Standing Committee chuan kum 1954 February ni 16 chu KTP Day atan a pawm a. Tun

dinhmunah KTP member mi nuai khat sing sarih leh sang khat zali pali (1,71,404) an awm mek a, branch 904 a awm mek bawk a ni.

<><><>

ASSEMBLY

Tun thla ni 19 atanga tan tur Assembly inkhawm (budget session) atan starred question 740 lehziaka chhan chi (unstarred question) 88 a lut tawh.

Assembly secretariat atanga thu dawn danin zawhna hi sorkar atangin dan siam tura duan pathum a lut tawh a, heng te hi Labour, Employment, Skill Development and Entrepreneurship Department, Urban Development & Poverty Alleviation Department leh Finance atangin a ni a, heng bakah hian Official Resolution pakhat leh Resolution 85 a lut tawh a, Paper lay tur 5 a lut tawh bawk.

March ni 20 thleng assembly thutkhawm awm turah hian ni 14 chhung an thukhawm dawn a, February thla ah vawi 2 thu in March thla ah vawi 12 an thu dawn a, Assembly inkhawm tan ni, February ni 19 hian larsap General Vijay Kumar Singh chuan kum khata assembly inkhawm hmasa ber a nih avangin dan pangngai angin Assembly chhungah thu a sawi ang.

Tun tum assembly inkhawmah hian March ni 4 ah finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh dawn a ni.

<><><>

PM MODI

Prime Minister Narendra Modi chuan nimin khan India chu Global Future chungchangah hma an hruai thu a sawi.

Delhi-a media house pakhatin Summit a buatsaihah he thu hi sawiin, India chuan tun hma lama a theih ngai loh-ah hma a hruai a ti a. Kum 2014 a tang khan India chu hmasawna kawng chak takah a kal tawh tih a sawi a, waviinah hian khawvel pum huapah dinhmun sang taka a din thu a sawi bawk.

<><><>

EAM

External Affairs Minister S. Jaishankar chuan khawthlang ramte chu democracy danglam bik anga an kalpui avangin a sawisel a, an ram chhungah democracy vawng tlat chungin, Global South-a non-democratic force-te thlawptuah a puh.

Nimin khan Munich Security Conference-a inhmukkhawmna-ah thu a sawiin, Jaishankar chuan khawvel pumah democracy a lal theih nan khawthlang ramte chuan anmahni bial pawn lama democracy model hlawhtling tak takte chu an pawm a ngai a ni, a ti.

India-in democracy lama a inpekna chu a tarlang a, ram chhungah ram dang ang lo takin democratic model a zawm tlat thu a sawi. Jaishankar hian U.S. Senator Elissa Slotkin-i'n democracy-in “dawhkan-ah ei tur a dah lo” tih a sawi chu a hnial bawk a, India chuan mi maktaduai 800-te hnenah mamawh a pe tih a sawi bawk a ni